





聖宋名賢五百家播芳大全文粹卷三十七

謝表

謝傳宣撫問表

余安道

臣某言今月初九日入內內侍省內侍殿頭張昭壽  
到昭州蒙恩傳宣撫問者中謝伏以國家恩涵四海  
威疊八荒春蠶茲徼外之狂蠻素號日南之小族自焚  
盧悵深入封疆未即誅夷上煩宵旰臣才非通濟命  
本羈孤誤分方面之憂適在傷殘之後道路之勤雖



至犬羊之戮尚稽方懼國章遽傳天語王人之重來  
自日邊口勅初聆如親帝所愧之前茅之慮或深挾  
續之恩敢不誨諭師徒敷陳逆順共勵在和之節庶  
成破賊之功無使腥羶得還巢穴上依睿算期振天  
聲無任

謝傳宣撫問表

余安道

臣某言今月二日入內內侍省內侍殿頭高居簡到  
州伏蒙聖恩傳宣撫問者人自日邊遠頒於休命語

傳天上如對於清光揣已甚微荷恩至厚中謝恭惟  
皇帝陛下丕承景運祇配嚴禋內盡志於祖宗畢  
薦誠於嶽瀆臣忝分朝寄適在海邦光華之使斯來  
郁穆之言遽及鞠躬聽命初同楚續之溫闔郡改觀  
共識堯雲之澤但臣無任

謝傳宣撫問表

張全真

叨紆郡組未聞襦袴之謠就遣使軺俯賁綸絲之寵  
吏民改觀山水增輝中謝伏念臣夙被簡知久陪嚴



近荐臨帥聞錄屏翰之微勞還付經帷極儒生之榮  
遇而臣久苦陰陽之寇復冒風波之塗力句就間屢  
投誠於黼宸曲蒙從欲更假寵於藩垣慚德意之未  
宣辱溫言之遽及此蓋伏遇 皇帝陛下天臨寰海  
子惠臣工愛民務極於綏撫念舊加隆於體貌尤軫  
竒孤之迹特頒深厚之辭煖然似春載榮蒲柳之質  
就之如日但傾葵藿之心誓勉効於微勞庶仰酬於  
異眷

謝傳宣撫問表

未能五日而報政方懷尸素之羞仰惟一事而同仁  
薦沐撫存之渥使華洎館輿誦載塗豈惟寒陋之增  
華咸識聖明之念舊中謝伏念臣才鍾蔬窳景迫衰  
殘繼叨剖竹之榮雖殫智力數困負新之疾蔑著事  
功已荷優容更垂簡記臨遣王人之重俯傳天語之  
溫此蓋伏遇 皇帝陛下正五事以承天心推赤心  
而置人腹眷股肱之輔郡德澤宜先軫帷幄之近臣



寵私未愬每曲形於慰藉以增重於觀瞻而臣體方  
中於沉痾神未還於舊觀固當自力思稱所蒙倦鳥  
知還終冀逃於曠責靈地感報庶或勉於後圖

謝傳宣撫問表

澤國承流蔑著蕃宣之効星輶傳命薦頒深厚之詞  
仰睿眷之有加顧微蹤之豈稱中謝伏念臣猥以凡  
器早踐要津荷黼宸之誤知入陪二府叨朱幡之重  
寄出殿三州志大何為性疎寡與毫髮莫聞於報補

筋骸屢困於沈綿周旋郡舍之幾時絡繹使車之及  
境溫言甚寵重拜知榮此蓋伏遇 皇帝陛下道大  
兼容智明旁燭憐簪履之舊物曾侍燕間錄屏翰之  
微勞益隆體貌衰遲自省榮懼交并雖撫字為勤未  
有及民之善政而寵光若此敢忘致主之初心當益  
勤於後圖誓無慚於晚節

謝傳宣撫問表

下車門俗始布欲於寬條乘駟經途遽欲頒於溫詔



拜恩稽首懷感銘心臣中謝伏念臣向蒙特達之知  
久玷高華之選大恩未報已迫衰殘睿矐有加曲垂  
簡記復畀上流之重寄敢辭行路之阻修念違梓穆  
之容未踰月律亟責坦明之訓就遣星軺式慰羈孤  
益隆體貌此蓋伏遇 皇帝陛下廓漢高之大度推  
光武之赤心雨露所濡天何心於遠近絲綸之出人  
自改於觀瞻仰恃寵靈庶逃罪戾倘少收於薄効敢  
自愛於餘生

謝賜修實錄獎諭手詔表

王禹玉

伏奉手詔以近傳宣取索仁宗寔錄二冊入內特賜  
獎諭者伏讀嘆驚戰汗失次恭以 仁宗皇帝享御  
天下四十二年豐功茂烈寔配天地宜得遷固之材  
以論撰本末著之無窮先皇帝乃誤以臣等充詔而  
歲月淹晚未克就緒伏遇 皇帝陛下始初清明追  
悼文武方虞罪斥而特形手札之賜奎壁夜謨驚震  
群視雖前世史官饗蒙獎諭未有若此之比也臣某



等敢不夙夜研思趣成大典勉以稱陛下褒勵之意

進觀御書梵字詩謝降詔答諭表

宋公序

轅音頌聖方要於斐狂綸檢垂慈更加於褒獎觀文  
眩目拜賜兢心竊念臣仕籍叨榮儒林廢業游玷疑  
丞之地皆陪潤澤之場探內學以非優撫鈍根而永  
慨幸遇 皇帝陛下欽揚祖列丕護真乘因竺館之

先規續貝書之妙蘊盛延開士深究旁行對翻華裔  
之音博采形聲之說法官多暇書苑留神爰御寶趺  
親題梵畫仍冠篇而善叙且作刻以垂芳紺殿雄成  
祇園聳觀寶睿才之攸縱顧佛劫以增遐而臣例屬  
齋薰獲窺摹矩不勝私幸竊綴短章仰煩夜石之程  
已積春冰之畏敢謂伏蒙 陛下靡捐介善申寵近  
司枉深訓以發中廓犬猷而與進戴恩嶽重徒極於  
將顛揣已毫輕未知夫為報姑銘獎拂用寘肝脾臣



無任

謝降詔答諭立御書梵字碑表 宋公序

寶文就刻譯侶叢歡因善護之成功虔率和而露奏  
紆頒制墨俯煥塵襟中謝伏惟 皇帝陛下將聖自  
天大猷覘古丕承下武之緒兼通西聖之言闡其洪  
慈衛我羣品惟梵文之流布乃佛說之信傳雖曰旁  
行實有成法比乘聽斷之裕悉標聲畫之元譬震旦  
之六文謹舌人之異說氣瞻雲漢文含日星奮天藻

以題辭勒媧珉而庇宇古今參驗非科律之難分華  
竺雙提若迦陵之親演而臣幸陪法席親覩帝華不  
勝鳧藻之情用列縑囊之感方塵清覽遽錫溫辭覺  
苑同文已預人天之會尚方乙牘更膺緡綽之褒徒  
篆情涯曷酬恩遇臣無任戴天荷聖激切屏營之至  
謝太后撫問第一表 王禹玉

伏蒙聖慈以臣祇奉大行 太皇太后靈駕在道特  
降中使傳宣撫問者申飭使輶下頒慈詔仰銜優渥



舉集驚榮恭以 太皇太后仁孝惠和聰明睿知母儀后德輔導之力居多聖子神孫保育之恩殆至愴玉衣之如在瞻龍馭之已遙維時瑣才方尸大事豈謂伏蒙 皇太后殿下哀思及遠聖慮發中頻加惠於具臣頓紆勤於長道尚圖微績少答殊恩

第二表

使華絡繹睿澤便蕃寵極自天震深臨谷伏念臣叨聯承弼首預勸防罔知行役之勞惟盡夙宵之慮方

屬青天煒煦黃道修除時無寒暑之侵衆無險易之利舊章具講大事行襄豈謂伏蒙 皇太后殿下孝篤奉先恩隆逮下禮不以人而稍廢事繇有素而弗僇故沓惠於溫言俾各祇於能務

第三表

游屈使華嗣膺宸諭承命既渥撫躬靡皇伏念臣才匪適時任惟承乏屬因山之歲事叨奉駕以啟行下翔鳳之瑞闡風雲為之變色過躍龍之間館道路莫



不隕心方激中哀復推異數此蓋皇太后殿下念  
姑嫜始終之大義有子孫付與之至恩愴自慈襟惻  
及多露惟誓糜軀之効上酬載物之私

謝皇帝撫問第一表

王禹玉

伏蒙聖慈以臣祇奉太皇太后靈駕在道特降中  
使傳宣撫問者使輶遙至宸綽下臨仰體眷懷竊深  
榮懼恭以大行太皇太后功隆德盛善積慶長退  
處東朝之尊安享三宮之養不圖奄棄慈極遽即僊

遊方從車翬之行未有夙宵之效伏蒙皇帝陛下  
堯仁多惻舜慕逾深詔發芝封已建因山之號歌流  
薤挽更勤陟屺之思載矜將命之勞申錫徽光之渥  
撫存特厚啟處奚勝

第二表

星輶旁午宸綽丁寧恩泐隆禮感積驚至伏念臣叨  
膺聖選獲典厥儀屬先遠之告期集方中之秘藏望  
清洛山川之舊聽黃麾鼓吹之音瞻慕無窮哀號曷



處豈謂伏蒙 皇帝陛下有懷在外馳詔自中發明  
孝思既惻星霜之變嗣傳使指又經霧露之勞終自  
勉於寸愚庶靡墮於朝命

第三表

洊發星輶曲頒宸指寵加典外愧浹情涯伏念臣偶  
緣聖知擢寘宰輔泣讀上賓之告號冠典喪之行望  
極霸陵不改山川之舊悲深慶壽更無歌舞之餘顧  
大事之甫襄敢羣志之弗勉豈謂 皇帝陛下情隆

送往恩眷庀司帝所深嚴時發鈞天之想王言溫厚  
更增陽谷之和雖內盡於單忠曷仰酬於洪造

謝傳宣撫問賜藥表

張全真

輟九重之近密俯賁溫言軫三伏之炎猷寵頒珍劑  
恩非常擬感溢情涯中謝伏念臣一去闕庭再罹寒  
暑餘齡腕晚病骨支離未酬覆載之私每迫陰陽之  
寇欲逃瘵敗歸乘下澤之車敢謂記憐加賜上池之  
藥此蓋伏遇 皇帝陛下坐恢遠略力致中和在知



人在安民不泄邇不忘遠察臣久陪帷幄粗忠樸而  
无它以臣遠守江湖假威靈而增重閱歲華之始半  
辱使駟之游臨臣敢不勉竭疲駑少圖報補俗期無  
犯田收賣劍之牛病或有瘳身効銜環之雀

謝傳宣撫問賜藥表

臣某言十二月五日伏蒙 聖恩差入內內侍省高  
班主管合同憑由司王錫到府傳宣撫問并賜臣銀  
合膳茶者臨遣星輶速若置郵而傳命俯頒奩劑威

無咫尺之違顏登受以還兢榮自失

中謝

伏念臣叨

分近輔莫著微勞顏齡浸迫於西山况嬰衰疾短景  
適臨於北陸尤苦祁寒是資服食之良以禦晦明之  
沴豈蕭然之朽質特簡在於清衷既責溫言復加珍  
賜尚方修製靈於紫府之丹御寶緘封貯以白金之  
器玉人俯洎父老驩迎此蓋伏遇 皇帝陛下居上  
克明使臣以禮俾盡股肱之力曲全體貌之誠念臣  
頃參帷幄之籌義同休戚憐臣密備藩垣之之寄衆



所觀瞻特假寵靈以榮觀聽起瘴濱之沉瘵指日以  
須存魏闕之精誠戴天知感誓圖九殞仰報萬分

謝傳宣撫問賜藥表

王介甫

膚使寵辭載華原隰寶奩珍劑加責正園臣

中謝伏

念臣少出衡茅晚陪帷幄德輶寄重才淺知深但念  
里居長負丘山之責敢期宸眷尚留簪履之矜此蓋  
伏遇 皇帝陛下天幬无疆海函不棄戴難忘之盛  
德豈特銘肌撫易盡之餘生唯當結草

謝傳宣撫問賜芥藥表

葉少蘊

使傳俯臨殆非常禮寶奩拜賜併沐異恩自驚衰朽

之餘曷稱褒嘉之遇臣某

中謝

伏念臣迂踈寡與慙

拙多艱早歲朝廷既乏秋毫之効暮年疆場何施汗  
馬之勞誤辱眷慈猶叨委寄愧懇辭之弗獲曾報政  
之未遑遽屈王人親承帝問措紳改觀共知聖主之  
不遺里巷爭傳更覺陪都之增重此蓋伏遇 皇帝  
陛下曲矜舊物欲勵邇臣念其嘗事軒墀久絕朝天



之望憐其服勤簿領未忘報國之忠借以寵光榮其  
晚暮江壩地廣敵境秋高明詔申嚴預謹奔衝之寇  
奏封賜可仍凋瘵之民願竭疲駑少酌聖造

謝傳宣撫問賜茶藥表

葉少蘊

內府兼金尚方珍物禮加異數屈使指以親臨威不  
違顏凜天光之在望臣某中謝伏念臣久從流落晚  
際聖明橫草無功徒欲捐軀而盡瘁飲冰自勵敢懷  
擇地以圖安第迫衰殘終辜捐遇詎意乾坤之大造

誤矜犬馬之微勞既俾後圖仍申好賜豈獨至仁之  
廣被姑示匪頒仰承厚意之所將殆非前比茲蓋伏  
遇 皇帝陛下光明下濟博厚兼容正陪都管鑰之  
崇欲先四海嚴大國封疆之寄用聳三軍故憐簪履  
之微曲假軒墀之舊力已疲而任重恩愈厚而報難  
臣敢不勉務涓塵益扶朽鈍言而有補敢忘藥石之  
酌義所堅期效金湯之守

謝賜詔藥物表



輟宮闈親近之臣臨河海寬閑之野授之藥物撫以  
訓辭尸厚祿而無勞謂當誅絕捐大恩而不報彌所  
兢慚臣中謝伏念臣出本羈單自甘淪棄晚由朴學  
上誤聖知智曾昧於保身忠每懷於許國讒誣甚巧  
切憂解免之難危拙更安特荷眷憐之至况遠迹久  
孤之地實邇言易間之時而離明昭晰於隱微解澤  
頻繁於踈逖此蓋伏遇 皇帝陛下以上仁含垢以  
大智容愚弗使南箕得此簸揚之狀更令北戶坐蒙

臨照之光蕭然垂盡之病軀沈若橫流之感涕惟困  
窮無理猶致命於一餐顧冒昧不貲敢忘懷於九死

謝獎諭表

晁之道

遵奉聖謨繕脩戎備載紆睿獎增激懦衷中謝竊以  
朔方奧區天下重地神考講安邊之策盡古今之所  
長聖朝廣嗣武之聲兼細大而畢舉維是城守之具  
未完萃聚之功親喻德音徃圖緯績遂一新於戎器  
益坐震於天威實惟聖制之修明亟獲事功之建立



顧慚迂拙誤玷寵褒此蓋伏遇 皇帝陛下天運沉  
機日昭獨智務講兵家之上策以究聖人之極功兼  
錄微勞用勸羣吏臣敢不勉軀駕蹇圖稱使令定止  
三川薦克就緒惟茲一道方促奏功斯仰體於顧懷  
誓永堅於忠節

謝獎諭表

晁之道

犴獄屢空皆本克寬之德璽書亟下倍懷非據之慚  
仰窺眩驚俯揆戰慄

中謝

竊以畿分千里輻湊萬邦

雖有趙張之才猶艱獄市之寄乃今朞月忽三敬於  
園扉考古盛隆未一書於方冊豈有司能使其不犯  
宜聖主獨以為極功顧錄微勞普加誤獎雲章垂象  
已蒙燭於三辰奎壁載圖仍諦瞻於八法夫何冒昧  
獲此遭逢此蓋伏遇 皇帝陛下大德好生成功不  
宰罔兼庶獄遂臻刑措之隆申勸羣工特厚袞褒之  
寵而臣雖參實賜獨負空食上懼貪天以為功下愧  
因人而成事永藏漢禮自欣千載之時力誦堯仁願



拜萬年之壽

謝獎諭表

張全真

臣某言近者本路諸處羣盜相繼平殄緣久勤聖慮  
略具奏知今月初三日伏蒙詔書獎諭者四郊多壘  
盡陶簫勺之和一札之文誤被絲綸之寵吏民改觀  
山水增輝臣中謝竊以盜起貧窮故詩人詠盈止而  
後寧止治貴清淨故循吏謂勝之不若安之矧惟江  
西稍遠闕下狃噐訟之習而稔熟其兵甲遭焚掠之

暴而隳廢其田廬蟻聚蜂屯既結而不散草薶禽獮  
垂盡而復生上軫九重之憂尤艱一路之寄如臣本  
无術略加以衰遲親承訓教之音恭布寬大之詔人  
非木石固知懷德以歸心惟有豺狼亦或畏威而革  
面至於遣戍兵而督捕殲首惡以示懲政以罔悛殆  
非得已故稍戢弄兵之俗汔可小康未能臻奠枕之  
期曠然大變心冀寬於憂顧跡頗類於言功乃蒙旌  
闡制之微勞降璽書而褒諭人所助者信也實由聖



德之誕敷臣何力之有焉徒愧恩言之重渥此蓋伏  
遇 皇帝陛下懋湯大德達舜四聰孝通神明外默  
孚於強敵化行江漢內自格於羣偷欲獎勵於庶工  
故推揚於一善臣敢不仰體勸功之意銘深厚之訓  
詞俯思善後之方息愁歎於田里庶幾晚節不辱睿  
知

謝遣中使撫問表

王介甫

孤臣疲曳自阻進趨上主慈憐猶加撫諭中謝伏念

臣晚陪休運特荷異恩橫草無功每恨棄軀之晚負  
薪有疾仍慚制祿之優豈謂 陛下所總萬機不忘  
一物廼因輜軒之出俯逮躋屨之遺仰荷眷私唯知  
感涕

謝奏陳金賊退敗降詔獎諭表 葉少蘊

正王者之兵既張天討申與人之誦少達下情仰荷  
眷慈特膺除獎臣某中謝伏念臣少而不武老益無  
能當長江禦侮之衝適醜虜敗盟之際惟紂臣有億



萬衆皆倒戈攻後之徒而楚惡已數十年亦曷喪皆  
亡之日戎車既駕我武惟揚敵所愾以爭先首推克  
燭取彼殘而共殄卒掃妖氛慙無矢石之勤濫竊璽  
書之賜敢懷掠美輒奏罔功茲蓋伏遇 皇帝陛下  
謀發自中威行無外不震不動圖回每盡於敵情能  
弱能強始弗逃於聖算欲勵服勞之士故捐假寵之  
勞臣方病衰懇祈退免堯言爭誦雖莫酬君父之恩  
漢札細書猶足示子孫無窮之寶

謝傳宣入伏早出表

胡武平

景炎朱火氣匿庚金伏日早歸雖聞著於漢令中曦  
促下乃特軫於堯仁忽降使璫俯傳天語荷承恩之  
下既欽渥旨之曲全中謝伏惟 皇帝陛下若古凝  
猷對時孚化愛溥將之靈命躬博愛之至仁眷乃近  
司釐茲庶務當炎帝承離之盛矜此服勞推憂王扇  
暘之慈俾爰風退去公門之煩溽獲私室之燕申臣  
等謬以庸虛叨斯密勿竊樂舒長之化弥欽寬大之



私

謝宣使入伏早下表

王禹玉

伏蒙聖慈差入內侍省高班某傳宣三司入伏早下  
至未伏依舊者伏以炎煒貫叙適當祠伏之初詔驛  
傳音俾遂退公之佚被寵至渥拊躬若驚伏念臣器  
稟孱微慶逢休盛侍帝殿之邃乏嘉猷之屢陳綜計  
廷之繁殆經費之鮮給然而金穀萬計夙宵一心方  
懷謫之寢深敢圖安而自便豈謂 皇帝陛下爰均

臣體慈發天衷載矜猷鬱之辰甫降深純之誨舉漢  
家之令特優出沐之期詠周人之詩敢數在公之節  
永肩勤瘁上答生成

又

伏以上伏之辰載離於煩暑中發之詔有惻於庶司  
日遂公休舉銜聖寵伏念臣早緣懵學獲齒清時居  
乏先容之階獨誤上知之厚晚輸忠瘁徧歷顯榮剗  
京兆之煩固政迹之無異綜大農之計幾心畫之曾



殫然而職隆則謗所叢材鮮則事不給寒暑回薄敢  
思退食之安夙夜勤勞大懼曠官之謫豈謂 皇帝  
陞德深天地愛浹臣鄰軫炎籥之御時降使貂而申  
命蠲曹事之冗俾從少間之私竭公家之為終盡一  
心之報

又

伏以夏籥之交甫會三庚之熾詔聲之發有矜庶府  
之煩退樂公休仰御天寵伏念臣緣末學之進乏先

容之階早塵賢路之游遽竊禁林之侍奉藩宣於外  
蔑治迹之布聞筦財利於中幾心計之瘁盡然謗叢  
材薄責起任憂殆歲月之末功曾夙宵之敢肆伏蒙  
皇帝陛下至人裕物元化參天念時之暘則及人  
以恩閔職之勞則均人以逸舉漢儀之舊率遂早歸  
之期因庚制之頒更宏多暇之政臣珪敢不靜而經  
事居則圖庸一心在公之為少酬自天之賜

代內相謝入伏早出表

張全真



流金之候上軫淵衷出綍之私俯優近列早容退食  
俾遂燕居事雖襲於故常恩寔超於夷等中謝伏念  
臣才非東里籍忝北門坐驚寒暑之往來莫贊風雷  
之鼓舞奔馳觸熱獲逃襜襪之譏進退自公每效委  
蛇之節而况燭蓮夜直入以為榮懷肉早歸心焉竊  
媿敢謂四聰之洞達特憂三伏之炎熹禮視股肱之  
崇愛均父母之厚此蓋伏遇 皇帝陛下仁天至大  
慈實為先念暑暵之侵時酌人情而均適雖朝日至  
昃躬無逸之憂勤而薰風自南廣餘涼於黎庶臣等  
敢不體如天之詔深懲畏日之嚴待清燕之間更勵  
飲冰之志

謝詔赴闕表

宋公序

使駟光華甫臨州部言綸溫密申錫詔甫聞命震惶  
撫躬跼蹐臣某誠榮誠懼頓首頓首竊念臣嚮辭宰  
政出布藩條專處外以首公顧還朝而絕望周旋三  
任首尾八年終微樹化之方可稱惟良之歎比者伏



蒙 皇帝陛下追憐舊物均賦羣材因內幄之缺員  
降輜軒而垂召仍緘帝札曲暢天慈諭發號之揚庭  
俾解藩而趨節孤臣何幸丕訓前頒未知讓爵之端  
先聳捐生之志感深成泣言拙無文方促駕以就途  
但望雲而翹首永言歸報倍萬常鈞臣無任

謝替赴闕表

臣某月日都進奏院遞到敕書付臣為差宣徽南院  
使保靜軍節度使王德用判陳州令臣候交割訖發

束赴闕者節音垂召詔底前頒弗棄而收釋憂為忤  
拜恩匪次戢感無涯伏念臣本以空疎誤蒙記識課  
勞未念竊寵已華遂自史員入塵禁閣水淺舟膠勢  
有必然馭拙吻傷理無容濟果煩正議將責罔功伏  
遇 皇帝陛下廣覆由天至慈如父謂樹立之始寔  
出羈平雖進擢以來不由黨援排訾擯刻屈憲回仁  
俾千石以出麾促萬分而自贖甫踰年律特改近藩  
墜葉重春推輶覆載會須輔鎮將授帥臣因得代還



以圖收齒聞命歡踊撫已震慙且念蕞爾孤生覩然  
去國長而多病衰不須年鬢雪紛斑目花眩黑越在  
遐外積有流憂尚恐狗馬道窮先填壑溝江漢天限  
無復朝宗敢期躋履之餘倏被召環之賜光華下集  
首領生歸威靈改加殞越奚報但念九閭在望十舍  
而遙雖否運已傾決無終塞而清光可仰敢俟駕行  
甫訖交節即當就道欣榮參會濫訥難宣

謝宣召表

含哀去國扶憊造朝黼坐禁嚴許之燕見玉堂閔麗  
賜以叨居申飭使人就傳德意事雖有故寵實非常  
莫之報稱之謂何徒荷眷求之如此

聖宋名賢五百家播芳大全文粹卷三十七終



聖宋名賢五百家播芳大全文粹卷三十八

謝表

臣某言伏蒙聖慈賜臣恤刑詔書一道臣已當時行  
下訖時屬長羸恩推欽恤渙若好生之德彰乎慎罰  
之文遠邇之心歡抃失次中謝昔者明王之治天下  
也作是五刑明茲三訊所以重生民之命而為大化  
之防恭惟 徽號皇帝陛下儉以率衆仁以愛人治  
定功成刑清事簡猶慮煩陽之候不無輕繁之人首



發德音俾觸罔者有自新之路復頒明詔欲分條者  
絕舞法之心式是太和同登於道至若有虞之畫象  
大禹之泣辜用此憂勤曾未差忒臣本疎材寡術謬  
掌郡符不能宣導於化風未得空虛於囹圄僣懷恩  
顧伏用兢慙是以益勵至誠恭遵大訓雖知聽審難  
臻明恕之方一覬寬平少副哀矜之旨云云

謝恤刑表

楊文公

臣某言今月十日本州進奏院遞到敕書一道賜臣

欽恤刑獄者臣當時集軍州官吏宣示仍下管內諸  
縣施行訖天網雖疎尚多於嬰拂夏日可畏用示於  
哀矜尺一之詔俯臨圜士之人何幸臣某中謝竊以

世質民淳唐虞以之畫象政平訟息文景幾於措刑  
蓋由五聽無寃三章不濫上懷欽恤之旨下萌耻格  
之心用臻太和式符至治伏以崇文廣武聖明神孝  
皇帝陛下憂勞庶政涵育群生化遠被於不毛仁必  
沾於行葦隱悼伏念表視民之如傷震曜誅夷示臨



下之有赫政經載肅治具畢張矧於流爍之辰獨軫  
係纍之苦皇華遣使在犴獄之已清紫素裁書復德  
音之荐降慮及米鹽之細恩同雨露之濡疾疢者既  
示醫治貧困者仍加廩給昔周聚毒藥止療於邦畿  
漢設淖糜不沾於囹圄足以彰皇猷之冠古寔以固  
率土之宅心仁去殺以勝殘永無為而無事臣忝分  
符竹肅奉絲綸徵慎罰之前言體泣辜之深旨金科  
玉律期適於重輕叢棘黃沙敢令於繁滯誓傾勤瘁

仰奉欽明臣無任歡呼激切之至

謝恤刑表

趙閱道

臣某言今月二十日進奏院遞到勅書一道賜臣欲  
恤刑獄者臣已逐件施行訖隆暑在候嚴宸軫憂將  
期率土之濱不使一物失所俯矜留繫仰戴明仁臣  
某中謝恭惟 皇帝陛下盛德如乾坤至仁若堯舜  
屬茲大夏念爾多方博愛無私遽下丁寧之詔得情  
勿喜俾知寬大之恩臣忝分千里之符親沐九天之



澤省視囹圄之繫下無寃人布宣朝廷之文上助和氣臣無任

謝恤刑表

蔡君謨

臣襄言五月二十九日進奏院遞到詔書一道賜臣欽恤刑獄者臣已施行訖寬詔發中至仁逮下當赫隆於盛暑俾明慎於常經正亡推恩普天同抃臣襄誠惶誠恐頓首頓首伏惟 皇帝陛下文明御宇法則在躬親攬萬機休有一德化鴻鈞而被物道皇極

以愛民畫象衣冠思循於往制省罪囹圄曲暢於至慈特布訓辭用清科禁臣叨臨藩服絕遠朝廷臣無任瞻天荷恩激切屏營之至

謝恤刑表

張文潛

歲舉舊章雖謹有司之職詔頒列郡寔皆天子之恩恭以聖人之於物蓋本好生哲王之用刑初非獲已方天時之炎燠憫囹圄之係纍渙發德音卹及民隱伏惟 皇帝陛下哀矜庶獄明慎用刑內脩百度以



以肅權綱外推至仁以惠黎庶下念狴牢桎梏之苦  
必使飲食沐浴以時君恩及斯民念何有臣職當賦  
政責在承流雖未能禩聖代之措刑必使無訟而竊  
慕古人之為獄自以不寃

謝恤刑表

余安道

四序均和聿屆蘊隆之候萬邦有宥爰推欽恤之仁  
中謝切念臣本乏吏能謬當州寄屬傷夷之乍起復  
忠愛之未孚粵此撫封寧無滯訟涉茲煩溽或窘狴

牢上軫宸聰俯憐遐俗譬諸籠檻開以尉羅特示哀  
矜之懷庸頌寬大之詔敢不恪遵漢制祇稟堯言獄  
未逮於簡孚情靡忘於伏念庶俾係累之者無嗟暑  
暘之傷恢布聖恩遠周邦域

謝在中書日行遣公事不當放罪表

范文正

臣某言近准中書劄子伏蒙聖慈以臣等在中書日  
行遣李曇男公事不當特放罪者具位之材早虧於



國論大明之照終示於天慈爰霽震霆允為渙汗臣  
中謝向以昧陋參於機微心則首功智非周物日視  
四方之奏類多庶獄之疑而有告訐以言情偽未究  
妖兇暨斃證在弗完上開三面之仁在刑惟恤僉重  
一成之議至失不經多歷歲時尚騰牒訴伏蒙 皇  
帝陛下川澤廣納日月委臨察其無他怒茲不及天  
地之私至大丘山之戴何勝敢不再省前尤一心後  
效少贖失中之咎用敷報上之臣臣無任感恩荷聖

激切屏營之至

謝降御前劄子表

韓魏王

臣某言遞中降到御前劄子二道伏蒙聖慈以近為  
賊犯渭州山外亡失主將具狀待罪許臣別圖來効  
以刷前恥者敗軍有法本不期貸責效以恕使得盡  
死中議謝伏念臣識暗經遠才屈任重偶以童蒙末  
技優竊科等幸遇天下無事方垂徹警專脩俗吏之  
業罕究兵家之學屬以羗落背惠王師興伐朝廷用



不求備俾泰西略臣自念狂賊桀驁邊民被毒人無  
愚智奮身願效况臣粗識忠義能不憤激故受命引  
道無敢固辭赴職以來朝計夕慮思有所立上寬聖  
懷以至馳奏庭中方授成算還趨塞上亟整師屯而  
兇渠并兵親犯隴外臣素料其至先集衆軍猶慮勢  
分遣其齊進不謂諸將持勇至此敗覆致此雖指縱  
可驗似不媿心而職事有墮理當請罪伏蒙 皇帝  
陛下燭幽垂察含垢示慈謂李廣數竒非由失寄孟

明三敗終能贖過荐頒溫詔許竭後勤臣敢不嘗膽  
以思忱戈自厲劇寇尚在豈還朝之可期素志未伸  
度捐軀而後已臣無任云云

謝擅減均糴米數放罪表 汪彥章

臣藻言准尚書省劄子湖州奏昨承尚書省拋糴米  
三萬石及屬縣經承發運司糴米三萬五千石本州  
官吏輒上體國計下酌民情將兩項米一面分下諸  
縣各糴二萬石所有不候朝旨回降先次免減罪犯



伏乞重賜黜責奉聖旨依奏仍犯罪者守藩無狀妄  
干專輒之誅當宷原情遂虧已除之詔恩雖衆共幸  
獨臣多竊惟師旅之屯莫重餼糧之積矧當巡幸尤  
急轉輸乃緣凋郡之餘擅減太倉之入坐期遣黜反  
獲矜從此蓋伏遇 皇帝陛下求治焦勞愛民惻怛  
謂區區郡邑敢懷閉糴之心而碌碌書生寧識泛輸  
之罪露奏方塵於乙夜免符已降於中天臣敢不推  
廣上恩訪求民瘼催科靡及既容拙於陽城矯制自

歸復寬於愚汲黜誓與此邦之生聚共圖他日之靡  
捐

謝走失編管人放罪表

張全真

徙鄉之惡宜謹防閑失職之愆自甘竄斥敢謂兼容  
之庶曲推善貸之仁 中謝 伏念臣才不足以達庶事  
之經權智不足以察小人之情偽况乃病悴困於極  
煩顧姦慝逋逃雖有司之不成而教條踈濶亦長吏  
之非才欲警官長宜從議吏方席藁以俟命遽出綍



以疏恩不汝疵瑕猶天覆燾此蓋伏遇 皇帝陛下  
宥過無大御衆以寬謂建厦非止於一枝故張網必  
開其三面原情定罪既嚴主守之科觀過知仁曲全  
體貌之意敢不鞭其不及圖以自新仰思全度之私  
俯誓捐軀之報

謝赦書表

張全真

際河之封再歸版籍配天之澤覃被幅員疾置流傳  
輿情呼舞臣中謝臣聞晉鑿符秦於泝水之上猶勤

八萬之師吳奔曹魏於赤壁之傍僅保三分之地糜  
爛其民而戰功烈 如彼其卑坐視中原以資敵國  
曾未有不煩遺鏃遂得侵疆卓然標一代之勲煥乎  
如今日之懿此蓋伏遇 皇帝陛下廣大配天地孝  
悌通神明料強敵於沉幾決大疑於獨斷修政事而  
復周境何愧宣王敷文德以格苗民遠符虞帝既獲  
和戎之利大推肆眚之仁臣夙贊鈞衡薦分藩翰惠  
此中國已共沐於湛恩守在四夷願永觀於丕顯



謝軍寨遣火放罪表

葉少蘊

奉職不處自貽曠放撫躬引咎方俟謹訶仰荷寬慈  
曲從貸釋臣某中謝伏念臣素無遠用本實凡材沉  
迷簿領之間徒勞無補出入兵戈之際愈久益踈誤  
竊守符仍司留鑰既不能折衝強敵所盡力於疆睡  
又無以和輯疲民使安生於閭里致令非意罔戒不  
虞知重廢於官常敢幸逃於吏議茲蓋伏遇 皇帝  
陛下廟諱徽接下以德行仁雖愛憫黎元如御朽索之

馬而保全臣子每漏吞舟之魚念將迫於終更併不  
汚於後累臣不敢勉殫衰懦深務省循豈不懷歸未  
遂乞身之請退思補過終慙報國之心

謝居民遺火待罪令安職表 葉少蘊

無功受祿已愧素餐有罪不誅復叨寬典仰惟大施  
畢出至仁臣某中謝伏念臣誤以疲駑薦蒙委寄方  
戎馬戒嚴之際且旱暘害稼之餘反側未安彫殘易  
困雖無撓獄市每師齊相靜治之風而御守封疆敢



忘魯人請事之意訖無寸效重愧本心可密非意之  
憂更速曠官之責法當顯黜恩獨原情茲蓋伏遇  
皇帝陛下德極含洪道全忠怒八柄並用固將昭示  
於賞刑三宥所加終欲掩藏其過失幸其可再居不  
遑竄臣敢不上體眷慈勉扶衰病尊簡書而奔命未  
敢言歸記焚室之寬征庶無所失

謝賜御製御書封禪銘贊記副本表

張乖崖

臣某某進奏院遞到編錄封禪記丁謂等起請御製  
御書泰山銘贊記抄錄副本一卷賜臣者聖作深玄  
人所難睹外臣有賜恩出非常中謝臣聞渡汾流詠  
止嘆於周年遇沛興歌庸思於共守豈若天祚明德  
功格上玄既東巡以告成復勒銘以見意煥乎盛業  
垂被無窮誠明代之嘉猷而真聖之能事也恭以  
皇帝陛下生知要道天縱多能體二聖之仁明鑑百  
王之得失側躬致治元化大同以至和氣四充祥符



下集覽闕下諸生之議感泗上父老之言遂事升中以展大體皆謂太平者前王難及之事 陛下致之泥金者曠代不修之典 陛下行之嚴父配天孝之至也為民祈福仁何遠哉事感宸衷言成國典眷茲近列許遂榮觀實類管窺莫從天際有若歸功天地推德祖宗謙讓在思惕厲為誠此人世不名之福乃社稷無疆之休也臣叨塵要職獲守雄藩拜賜以來歡心莫極雖收藏有耀求為傳世之珍而衰力無能

但見感恩之淚云云

謝賜資治通鑑序表

司馬溫公

臣光言伏蒙聖恩令臣讀所修資治通鑑仍面賜御製御書序一篇者臣性識駑鈍學問空淺偶自幼齡粗涉羣史嘗欲芟去蕪雜發揮精雋窮探治亂之迹上助聖明之鑑功大力薄任重道悠徒懷寸心行將白首伏遇先 皇帝若稽古道博采微言併據舊聞遂伸微志尚方紙墨分於奏御之餘內閣圖書從其



假借之便未遑汗簡已位遺弓 陛下祇服駿命丕  
承前烈臣以屬橐有緒不可不成受詔所為不敢不  
上銓次無法牴牾實多仰汚覽觀伏須罪戾豈謂  
皇帝陛下赦其狂簡賞其專勤思所以旌異於佗書  
焜耀於羣下特發除恩不用常例屬當勸講之始俾  
叅經史之末迨此清閑命之進讀而又叙其本原冠  
於篇帙發言為典肆筆成書炳蔚互異如虎豹之明  
灑靈無涯逾商周之盛況復褒貶是非古人有所未

未至造端立意愚臣不能自言 陛下一賜指陳渙

然冰釋至於博而得其要簡而周於事典刑之總會  
冊牘之淵林臣寔何人克堪此語若乃嘉文宣以作  
則援正觀而為師茲寔生民之福豈伊微臣之幸 中

謝竊以周之南董漢之遷固皆推高一時播美千載  
未有親屈帝文特紓宸翰曲蒙獎飾大振輝光如臣  
樸樵小才固非先賢之比便蕃茂澤獨專後世之榮  
退自揣循殆無容措遂使螢爝未照依日月以永存



草木常名附天地而不朽臣不任懇款之至

謝賜御書表

范堯夫

右臣等伏蒙聖慈各賜御書一軸者帝謨濬哲有以知天縱之能宸翰昭回乃獲覩雲章之盛墨妙周於物覩聖心著於日新臣等叨脩弼諧猥承睿睭雨露之澤方丘山而莫逾子孫之藏與鼎彝而增重臣無任

謝賜御書表

范堯夫

金華畢講宴需既示於深慈雲漢垂章宸藻嗣隆於厚睭窺聖造之超詣知天縱之絕倫繇慈訓之夙成審睿暮之日就臣等自惟近器得脩邇隣荷寵賜之不貲循懦心而載抃

謝賜資治通鑑表

劉莘老

來事之師莫如稽古作者謂聖嘉此成書思前訓之共由敕有司而申錫敢其孤淺曲被寵榮竊以帝王之道雖同治忽之時不一史惟廣記欲俾後世之多



聞書不勝繁常患當年之莫究簡則易治統之有綱  
恭惟先朝之緝熙遂詔名儒而論次網羅乎數千載  
之事潔齊於三百篇之中類集羣書劉邵上皇覽之  
發要明舊典譙周成史攷之篇祕以名山之藏進於  
華光之讀今期傳信更及分頒此蓋伏遇 皇帝陛  
下聖學日新孝思善繼亦既省觀於座右又將訓迪  
於臣工曾是衰愚預叨恩禮學如皇謚方興表借之  
心能愧班游遂有家藏之幸臣敢不玩篇籍之載求

臣子之宜攷終始以擇是非因成敗以昭勸戒庶見  
古人之大致少副盛德之萬分

謝御製和祝聖壽詩表

田表聖

臣錫言今月十七日宰臣瓊赴中書伏蒙聖慈宣賜  
御和臣所進乾明節祝聖壽詩二十韻者俯拜皇恩  
仰窺睿藻駭凡月而怔忡失次閱聖文而榮抃交并  
中謝伏以華封慶祝之辰里社呈祥之節頌聲合貢  
忠懇冀伸豈謂 皇帝陛下降御製而頒宣命台階



以錫賜始觀呼而跪受終惕厲以退思且書曰賡歌  
詩稱大雅但美升平之際會或揚德業之形容未聞  
臣下獻對菲之詞君上答英華之什斯實皇朝新事  
玄貺殊恩用紀瑤編六義常彰於睿思未光寶運千  
齡永固於昌期臣無任感恩荷聖榮耀兢惶激切屏  
營之至

謝賜御製逍遙詠祕藏銓表

王禹偁

臣等言伏蒙聖慈賜臣等御製祕藏銓逍遙詠共四

十一卷者伏以竺乾之教所以祛色相而示真如老  
氏之書所以去滋章而務清淨大不過四句偈多不  
出五千言始則殊途而同歸終則枝分而派別殆乎  
演三乘於貝葉文字漸多編三洞於瑤函筌蹄逾遠  
縱人十而已百奈暮四以朝三自非上聖之才孰立  
不刊之典發揮教法允屬文明伏惟 尊號皇帝陛下  
思玄沙妙心遊赤水因民設教與天比崇知幾其  
神建皇王之有極恭默思道念釋老之多歧於是銓



註微言詠詩至道撮其樞要闢戶牖於法門塞其菁  
英芟蕭艱於玄圃示萬機之多暇表三教之精通是  
可以指迷悞於群生扇穆清於四海豈比夫劉莊蕭  
衍但多佞佛之心漢武秦皇空作求仙之術自合鑄  
諸玉簡藏在名山將日月以同懸與鬼神而爭奧傳  
於不朽垂之無窮臣等謬列詞臣躬承聖教被堯天  
之雲霧已覺濡身聽舜殿之絃歌共知忘味謹當披  
持讀誦抃舞呼懽少遵善誘之心庶助無為之化臣

無任

謝賜御草書詩表

王禹偁

臣某言今月五日伏蒙聖慈賜臣紅綾上御草書趙  
嘏南亭絕句詩一首絳綃半幅霞舒舞鵲之紋宸翰  
三行雲遶迴鸞之勢天恩曲被凡目榮觀佩服戰兢  
神魂飛越中謝伏惟 尊號皇帝陛下書窮八法學  
洞九流英斷睿謨運玄功而多暇飛文染翰縱草聖  
以為娛閑裁浙水之綾爰寫渭南之句宮中刀尺剪



雲霧於赤城筆下風雷走龍蛇於碧落遍令中使宣  
賜近臣豈期瑣材亦預宸眷捧持失次傳翫增輝忻  
千載之遭逢極一時之榮遇讀盡二十八字列宿韜  
光宣來三十六宮天香尚在豈止藏於篋笥亦將傳  
付子孫堪笑二王非墨妙筆精之作如逢伯禹得金  
簡玉宇之書感恩空收於涕洟受賜更銘於肌骨臣  
無任戴天荷聖激切屏營之至

謝賜御製重午詩表

王禹偁

臣某等言伏蒙聖慈宣賜御製七言四韵重午詩一  
首者天有四時成聖功也八節所以宣其氣詩有六  
義繫王化也二南所以變其風至若運陰陽亭毒之  
功達雅重甚衰之理不失其政斯惟聖人中謝伏惟  
尊號皇帝陛下運應半千啟昇平之嘉會節當重  
午樂長養之玄功形於詠謠播作詩什特令中使宣  
示詞臣降鳳閣以光輝措魚須而抃舞仰窺首句如  
當帝舜之薰風載味卒章仍念屈原之貞魂教化以



被忠邪以分又何止述浴蘭懸艾之文逞白雪陽春  
之句而已哉臣等職叨掌詔才謝言謝獻尚書而諷  
諫無聞徒矜嘉節學離騷而淵源罕究但拜宸章願  
揚治治之音永作傳家之寶無任戴天荷聖懽呼抃  
蹈之至

謝賜御製月詩表

王禹偁

臣某等言今月十六日伏蒙聖慈宣示中秋月五七  
言詩各一首仍令依韵和來者月盈三五明天道之

無差運偶半千見聖人之有作雖聽賡歌之命終降  
寡之和詞傳玩為榮捧持失次伏惟尊號皇帝陛下  
精心六義思若永泉銳意萬機居無暇日當中秋之  
屆候玩素月之流空罷觀乙夜之書乃吟清夜載觀  
如圭之狀思繼白圭燦乎二章大哉四始頒於近位  
得遂榮觀雖酌海窺天罔知涯涘而君唱臣和親奉  
得音強率謏聞虔遵 睿旨効星辰之北拱徒竭  
丹心誦烏鵲之南飛終慙雅詠顧瑕疵之難掩諒尤



悔以何逃臣等無任謫時樂聖榮懼激切之至

謝賜御書字樣錢表

王禹偁

臣某等今月二十三日於學士院分賜得御書三般字樣淳化元寶錢者洪爐新樣通行將遍於萬方御筆摛華神妙互分於八體頒宣非次傳玩知榮中謝伏惟尊號皇帝陛下留意貨泉精心筆札書紀年之大號用煥錢神逞上聖之多才爰彰墨妙盡返鵲迴鸞之法掩天龍地馬之名莊山厯山之金可齊重

寶開元乾元之字莫比神蹤將大濟於兆民仍分霑於兩制臣等民慙夷甫才謝魯褒寔趙囊而空荷君恩探禹穴而難窮聖作周大公之圜法自合包修歐率更之筆精從茲掃地永言感遇空極兢榮臣等無任

謝賜聖惠方表

王禹偁

臣某等言今月二十五日進奏院遞到太平聖惠方并目錄共一百一冊臣等當時望闕謝恩仍依勅命



施行訖臣等謹按洪範響用五福其三曰康寧威用六極其二曰疾病然則疾病之作蓋天之威沮邪康寧之集蓋天之勸響邪此特立教而言姑欲驅人為善苟或飲食嗜欲之不節陰陽寒暑之不時為札瘥為沉痾為疢贅為瘡瘍若此之類縱而弗攻委之於極非聖哲之所用心也故醫術由是而生焉自黃帝岐伯以還作者衆矣以至叢乎無條貫浩乎無津涯思欲囊括古今派分類例參驗百疾稽羣合方惠於

兆民敷乃萬國非遇萬聖孰能興之臣某中謝伏惟尊號皇帝陛下惟睿作聖有孚惠心包天地之大德郡生罔不遂盡皇王之能事陸典罔不脩謂人之未庶也制昏姻以育之謂人之未富也薄賦斂以足之謂人之未教也施道德以化之又欲使五福之康寧徧流比屋六極之疾病不加蒸民於是召良醫考異術集自朱邸逮於紫宸幾三十年成一百軸洞乎天人之際探諸鬼神之奧製序引以述其事為模印



以行於時大頒四方爰出萬古昔玄宗之廣濟德宗  
之廣利皆叢剉渺末不足稱道尚具載史籍垂於後  
昆以為莫已若也况 陛下之述作功參化源天下  
之惇嫫身躋壽域雖復造書畫卦鑽燧播時不可同  
年而語矣宜乎與日月同縣與經籍共永豈區區小  
郡碌碌下臣能歌頌於聖德歟當州地居僻左路遠  
京師授教數年引頸以日累使郡吏請於有司始蒙  
頒宣蓋行次第而又今冬以來天氣稍旱過始冰之

候河無薄漸踰小雪之期野無微霰頗慮瘴癘害於  
民人俗罕名醫病則祀鬼分憂之任求瘼是專方虞  
後艱獲此大賚謹當抽俸金以市藥給官本以救人  
資聖祚於無疆流聖惠於不朽盡納淮甸歸於華胥  
縷縷之誠如此而已臣等無任遭時樂聖抃蹈之至

謝賜唐六典表

曾子固

伏蒙聖慈賜臣唐六典一部者冒貢微誠敢徼寵賚  
獲盈私望特出異恩中謝竊以繼貞觀之造邦維開



元之稱治財成唐典本庶務於尚書則象周官綴舊  
聞於經禮行之當世垂及方來伏遇 皇帝陛下接  
五聖之休期振千齡之絕業號令風采卑秦漢而不  
言網紀文章體唐虞而特起爰因廣覽俯逮遺篇俾  
加鏤板之傳賜及在廷之士顧最疎之庸下忘輒請  
之妄逾猥荷并容預均蕃錫敢不自強衰退悉意闕  
尋竊典故之緒餘少裨寡陋審官儀之委曲益勵疲  
駑

謝賜校定資治通鑑表

晁無咎

進奏院遞到校定資治通鑑所牒伏蒙聖恩賜資治  
通鑑若干冊付臣者先朝稽古之意名臣叙事之才  
成書甚難來世所考故乏丹鉛之補預蒙緡帙之頒  
臣補之中謝伏以 英宗皇帝睿哲生知憂勤遠慮  
欲觀歷世君臣張弛之跡以知千歲治亂得失之原  
深詔耆儒特加撰錄 神宗皇帝孝思善繼聖學博  
通三臣並封不特詩亡之歎五季更授厥惟麟止之



終發於雲漢之章賜以龜鏡之目恭惟 皇帝陛下  
論唐虞而圖治舉元愷而佐功興亡灼知屢省觀於  
乙夜忠佞大判爰警戒於在廷以嘗預於校讐故亦  
霑於賜予頒學官而伊始藏私室以至榮臣聞惟賜  
不常論報宜一圭瓚乃皂車馬則桀雖臣狹識而淺  
聞妄意深求而博考思事君許國之義奉以捐軀資  
愛民利物之方用而從政庶逃虛受之恥仰答非常  
之私

謝狀元以下賜周官表

陳誠之

聖經雅奧誕申傲於百官宸翰昭回用垂責於多士

得茲未有悅若自驚

中謝

竊念臣等猥以迂愚粗勤

學問身與諸生之列名叨六藝之科考師友之淵源  
蓋慚於甚淺論政事之得失或愧於不知載省其中  
未堪自信 陛下矜其無狀將試臨民謂何必謂書  
恐弗充於為學而不克師古亦因匪於攸聞若昔大  
猷布在方策雖本羣儒之所習或憂一旦之或忘爰



札周官用形聖訓上不及於簿書期會之務下無問  
於米鹽細碎之煩戒以典常勸以功業道本稽於文  
武炳若丹青筆賈掩於鍾王倬茲雲漢竊瞻偉觀仰  
認淵衷樂此光華下逮寒陋茲蓋伏遇 皇帝陛下  
德參化育誠茂經綸念夫法令為師恐流於刻薄要  
以詩書臨政可致於中和於其筮仕之初道以見經  
之旨肆令么麼均與恩盼臣等謹已十襲寶藏三復  
告誡不惟逸豫將終身而由之奉以周旋顧從政乎

何有其為感極至於涕零

謝賜

御製七十二字贊表

魏道弼

奎畫文章丕顯杏壇之至教牙籤玉軸蔚為泮水之  
榮觀偉此道之興宗振斯文而烜赫三熏拜賜十襲  
秘藏中謝竊以元聖素王雖一時之窮厄立言垂訓  
實萬世之宗師受其義者三千速而肖者七十類升  
堂而入室咸附翼以攀鱗自昔流傳見史臣之稱贊  
於今特盛仰聖作以褒揚如聞魯國之絃歌恍若孔



門之問答煥龍光之所被覺廟貌以增輝普頒惠於  
儒宮用開明於士類茲蓋伏遇 皇帝陛下多能天  
縱盛德日新當萬經之燕間探六經之奧旨發為睿  
藻迥超兩漢之文親洒宸毫高出二王之法恢張吾  
道竦動多方臣榮與諸生欽承寵錫潛心熟讀真同  
義易之重爻盥手披觀下陋唐宗之三絕

謝賜

御書孟子表

范元卿

蘊奧之義默契於淵衷昭回之光發揮乎宸翰分頒

有寵拜賜惟寅中謝竊以戰國縱橫衆言散亂乃篤  
生於亞聖以丕振於醞風闢揚墨之功不在禹下非  
堯舜之道不陳王前著為一經垂之萬世伏遇 皇  
帝陛下投戈講藝肆筆成書既深造於七篇復妙臻  
乎八法寫之琬琰炳茲丹青鳳翥鸞翔載出河圖之  
畫金聲玉振復傳洛誦之文臣猥被鴻私親瞻睿藻  
樂與諸生之講習益昭治世之升平

謝賜

御書孟子表



擬聖而作盡包羅天地之情肆筆而書發昭回雲漢  
之象寵頒儒館增賁人文中謝竊以百家存而醜者  
孟軻孰傳是學萬世知其解者大聖獨尊斯文惟默  
契於淵衷爰發揮於宸翰紹唐虞雍熙之治闡揚墨  
放蕩之辭炳若丹青寫之琬琰坐令亞聖之道復振  
右文之朝茲蓋伏遇 皇帝陛下盛德日新多能天  
縱翫味七篇之奧縱橫八法之精洛書河圖闡千齡  
之秘蘊璇題寶閣從多士之偉觀臣敢不奉以周旋

導之德意謹庠序而申弟悌但明人倫薄稅斂而易  
田疇更期民富

謝賜 御書孟子表

潛心德奧難量聖學之深微肆筆書林共仰奎章之  
炳煥敦化孰大拜賜為榮中謝竊惟典學乃帝王之  
心游藝亦聖人之事雖文沒而道未墜於地自軻死  
而世不得其傳茲由心畫之精得究人文之盛恭惟  
皇帝陛下道妙自得天縱多能方萬機之迂衡遍



乙夜以監古謂知言之要一本仁義而得書之體不  
外形聲乃於七篇之中備見八法之妙取諸運掌契  
若合符眷茲在外之臣亦被非常之賜臣幸窺宸翰  
庶獲盡心奉以周旋俾彼雲天之顯著格于上下昭  
然人物之護持

謝賜御書傳神贊表

秦太師

雲漢之章炳耀盪日奎壁之畫森列昭天自惟糞朽  
之姿曷稱龍光之澤對揚大賜孰復深慚中謝伏念

臣山澤臞儒鉉槩末伎麀頭鼠目甚寢可憎馬勃牛  
溲雖收何用畫蔑聞於籌筆圖敢望於凌烟屬上聖  
重整於乾坤俾遠臣密依於日月考甘露麟閣之選  
參永平雲臺之篇繪此支離藏之中秘冠標題於博  
陸親洒仰紐書之成先興贊於蔚宗視草靡一辭之  
措高蹈前古流芳匪今此蓋伏遇皇帝陛下天縱  
多能日新盛德依於仁而游於藝思其始而成其終  
謂誰昧愚首叨顯設臣敢不展布四體精白一心才



不長而貌不揚所資術正教之先而示之謹更懋義方

謝賜 御篆碑額表

王豐父

臣某言伏蒙聖慈特降御筆發明先臣某舊勞特賜御篆神道碑額及勅差官撰書碑文添修碑樓并立石者閱四朝之故老前績久湮仰八字之神毫沉寃一洗恩歸獨斷事協公言墓隧生光門閭復振中謝竊以宣尼表延陵之墓止獲素王之褒明皇題懷慎

之碑顧匪聖君之作猶事美於當代而名傳於無窮恭惟 皇帝仁冒天淵明齊日月煥堯章而致治纂禹績以圖功迪高后以康兆民永懷先烈定大策以安宗廟爰軫舊勞重念先臣蚤逢嘉會遇聖神於五五歲位宰執者十六年有協贊事功之勤及維持法度之効念嘉祐受遺之事餘藁具存察元豐建嗣之初忠言莫掩特下發中之詔用明既往之勲俾立豐碑庸旌舊壠松楸改色原隰增輝晉席弥文已極春



秋之法跳龍寶篆更高科斗之書裁銘屬乎相臣書  
丹詔乎法從倂完傑閣復命樞庭殊方傳以歡欣善  
類為之鼓舞精忠舊德事既白於九泉弱族孤宗報  
共期於一死

宸恩寬大衣被於羣黎睿藻昭回照臨於萬寓承休  
甚寵拜命惟新竊以方國賜書本建武中興之盛事  
為民下詔寔孝文務養之深仁於鑠聖時兼休二代

恭惟 皇帝陛下道侔天地德紹祖宗功烈無前孝  
治歡騰四表嘉祥荐至豐年屢格於萬邦憫茲穀賤  
之或傷尚致戶輸之過取賜頒寶墨申戒攸司粲然  
雲漢之垂穆若春陽之布臣濫紆州組躬受詔函周  
賦有常詎敢多於什一堯言在上庸知告以再三

哲宗實錄開院謝賜筆硯紙墨表

臣等伏蒙聖慈特降中使賜臣等筆硯紙墨者紬繹  
信書闢官曹而伊始詢謀故事給筆札以為先枉異



數之曲加撫寸長而安有中謝此蓋伏遇 皇帝陛下  
挺生聖質丕變人文維先朝迪哲之光有繼序適  
求之美森然斷簡豈徒副在有司燦若列星乃可傳  
諸無極而臣等職司典領忝備纂修甫窺東觀之藏  
遽忝上方之賜精毫良楮堅石鑿煤食浮已愧於事  
先器利尤慙拙於匠拙遷固特稱乎良史蓋以敷詳  
荀袁但謹於編年庶無疏抵誓當殫竭以答寵私臣  
等無任

謝賜 御筆表

晁之道

二聖奎圖恭承睿覽先臣勲德深軫皇慈親御宸毫  
俯臨鄩室三光參照千載增榮中謝伏念臣先父臣  
某勤勞百為夷險一節昔事仁祖再登宰衡外則成  
河朔又平之功內則啟嘉祐援立之策厚陵嗣服深  
褒王佐之才神考尊賢特右相臣之席晚被元豐之  
詔大明至和之功位冠宗臣勲在王室凡聖謨之詢  
逮與睿眷之寵嘉翰墨存賡歌未遠獲徹聖神之聽



益昭皇考之明曲念遺忠俯矜衰緒忽驚雲漢下燭  
草茅惟一旦之所蒙豈平生之敢冀而臣艱難薄命  
蹇淺下材自蹈窮途仰慙先烈數勲勞於多士無不  
遭逢獨寒瘁之一門最為衰替果蒙憫惻特借輝光  
此蓋伏遇 皇帝陛下惠澤川流皇慈天覆治功駿  
偉稽二帝而比隆誠意簡孚格三靈而並貺休符衆  
至協氣橫流惟八荒覆載之間舉无不獲豈四朝勲  
勞之後乃忍獨遺收之罪戾之餘被以涵濡之賜恩

加存沒榮動里閭念臣積愧冥頑粗傳忠孝獨叩天  
路以明父勲不辭斧鉞之嚴誅必冀精誠之上達前  
蒙昭鑒盡滌徃愆今竊寵靈更逾始望自惟困躋實  
費生成冀曲加於保全俾少振於門戶臣敢不內思  
淬礪外當激昂砥節立名不負教忠之訓闔門殞首  
少酬報上之心

謝賜戒石銘

張全真

陛祀勤銘夙仰祖宗之猷訓輜軒傳詔載新郡邑之



觀瞻跼受以還兢榮罔諭中謝恭惟太宗皇帝削  
除僭偽統一寰區屬四方新脫於干戈期百執恪遵  
於軌度肆頒聖製用謹官箴炳若丹青揭訟廷而咸  
覩寫諸琬琰垂永世之不渝吏有勸懲人亦康乂閱  
歲華之滋久致睿藻之弗宣有懷在位之苟媮深軫  
斯民之困敝得故臣之遺墨見上聖之宏規爰廣歎  
宣親加贊述大書深刻粲然盤鼎之文俯翫仰思竦  
若韋絃之佩此蓋伏遇皇帝陛下寬仁厚下勤儉

保邦率由舊章紹復大業何必官刑之儆自然民瘼  
之除紫詔相輝陋漢皇之一札黃堂增煥配章聖之  
七條臣久遠清光猥叨重寄惕然拜賜曾无咫尺之  
違顏何以酬恩尚勉期年之報政

謝賜戒石銘表

葛謙白

天語丁寧誕傳寰宇雲章黼黻俯逮私門祇奉匪頒  
惟知欽佩臣中謝竊以太宗皇帝憂國若渴視民  
如傷虞郡縣之吏游食以壞官慮姦貪之臣瘠人而



封已親紆寶思申勅庶邦立為戒石之銘光動奎纏  
之次庶乎委質之吏咸有奉公之心而乃睿訓弗詔  
攸司尚闕雖知愍史所載固磊落而畢陳然非邇臣  
再書殆洟汨而難見恭惟 皇帝陛下勵精庶政聿  
圖康功以孝奉先故宣布前朝之美以仁利物故發  
輝永世之規以謂德宗嘗製台衡之銘明皇大頒令  
長之戒猶傳琬琰顯示臣鄰矧惟昭代之彞章寔作  
萬方之藥石倘稽遐布曷示深慈爰錫輔政之臣俾

奉如絲之旨臣敢不丕承德意上體格言孫子襲藏  
永作緹中之寶晨昏警戒揭為坐右之觀

謝賜元祐新編勅表

田承君

一成不變君子所以盡心百世可知聖人所以救弊  
道存損益法有重輕講求既合於大中詳用必歸於  
至當頒諸率土賚及愚臣祇荷寵光伏增醜汗伏惟  
太皇太后陛下躬任妣之德秉堯舜之心宣室齋  
居既親於庶事明光斷獄乃止於數人尚慮滋彰務



通貫變俾之難犯而易避蓋出惡殺而好生克成幾  
措之風誕布不刊之典臣猥參近侍誤簡清衷顧此  
新書亦蒙大賜坦然明白既無詳讞之疑奉以周旋  
期盡哀矜之志載惟聖訓永得家藏

聖宋名賢五百家播芳大全文粹卷三十八終



